

大集地藏十輪經

大集地藏十輪經

上海佛學書局印行

大乘大集地藏十輪經序 大乘昉師撰

昔者旭照高山。天宮御一乘之駕。流輝原隰。鹿苑轉
四諦之輪。雖復發軫分途。而塗無亂轍。一雲普洽。而
卉木各茂。白鵠林變色。慧日寢光。達學電謝以息肩。
真人長往而寂慮。且前賢述聖。難令各解。後進孤陋。
更異親承。況乎正法既往。久當像末。定慧與福德異
時。醇化與澆風殊運。然則一乘三乘之駕。安可以同
其轍哉。若識時來在數。藥性勿違。然後可以清沈痼
之宿疾。體權實之同歸矣。十輪經者。則此土末法之
教也。何以明之。佛以末法惡時。去聖寢遠。敗根比之

坏器空見借喻生盲。沈醉五欲。類石田之不苗。放肆
十惡。似臭身之垢穢。故此經能濯臭身。開盲目。陶坏
器。沃石田。是以菩薩示聲聞之形。象王敬出家之服。
以此幢相。化彼無慚。顯二事之護持。成三乘之道果。
故經曰。爲令此土三寶種性。威德熾盛。久住世故。又
曰。摧滅一切諸眾生類。猶如金剛堅固。煩惱然則三
寶久住。顯教傳於末法。金剛煩惱。障異乎一乘。尋
舊經之來年代。蓋久。但譜第遺目。傳人失記。翻譯之
主。旣往來茲之日。罕聞同我者。失魄於真彩。異我者
大笑於淡味。謬以千里。能勿悲乎。夫極曜文天。或蔽

虧於薄霧。至言軌物。時淪滯於廣辯。鍼石一違。有死
生之巨痛。纖毫錯學。有升墜之異塗。具可異乎。屬有
三藏玄奘法師者。始則學架東朝。末乃訪道西域。輕
一生之性命。涉數萬之艱難。果能竭溟渤以索亡珠。
躡龍宮而窮祕藏。吞法流於智海。瓶瀉無遺。受道氣
於檀林。香風更馥。至於因明三量。聲論八音。莫不究
立破之源。窮字轉之本。如來所說。菩薩所傳。已來未
來。一朝備集。昉以薄業。不偶真應。幸達聖制。亂於未
肇。後賢傳燈於旣夕。遂使定死餘命。冀反魂於法藥。
昏野迷方。期還轅於覺道。於是染翰操紙。杜絕外慮。

務詳至教。釋彼紛執。疇諮法主。重啟梵文。粵以永徽
二年歲次辛亥正月乙未。盡其年十二月甲寅。翻譯
始畢。凡八品十卷。以今所翻。比諸舊本。舊本已有。今
更詳明。舊本所無。斯文具載。於是處座抗談者。響法
雷而吐辯。靜慮通微者。鏡玄波而照心。頂火暴腹之
徒。戢螢暉於慧日。喜足謙懷之侶。騰高節於清風矣。
前佛既往。後佛未興。庶此教長懸。永濟來者。弘道之
士。如何勿思。

目錄

卷第一 序品第一

卷第二 十輪品第二

卷第三 無依行品第三之一

卷第四 無依行品第三之二

卷第五 無依行品第三之三

有依行品第四之一

卷第六 有依行品第四之二

卷第七 有依行品第四之三

懺悔品第五

卷第八

善業道品第六之一

卷第九

善業道品第六之二

福田相品第七之一

卷第十

福田相品第七之二

獲益囑累品第八

大乘大集地藏十輪經卷第一

唐三藏法師玄奘奉詔譯

序品第一

如是我聞。一時薄伽梵在佉羅帝耶山。諸牟尼仙所
依住處。與大苾芻眾俱。謂過數量大聲聞僧。復有菩
薩摩訶薩眾。謂過數量大菩薩僧。說月藏已。爾時南
方大香雲來。雨大香雨。大花雲來。雨大花雨。大妙殊
麗寶飾雲來。雨大殊麗妙寶飾雨。大妙鮮潔衣服雲
來。雨大鮮潔妙衣服雨。是諸雲雨充徧其山。諸牟尼
仙所依住處。從諸香花寶飾衣服。演出種種百千微

妙大法音聲。謂歸敬三寶聲。受持學處聲。忍辱柔和
聲。精進勇猛聲。降伏四魔聲。趣入智慧聲。廣大名稱
徧滿三界聲。勸修殊勝念定總持聲。空無相無願聲。
厭離貪欲聲。色如聚沫聲。受如浮泡聲。想如陽燄聲。
行如芭蕉聲。識如幻事聲。無常聲。苦聲。無我聲。空聲。
慚愧聲。遠離聲。護念聲。慈悲喜捨聲。證得諸法聲。生
天涅槃聲。趣向三乘聲。轉大法輪聲。雨大法雨聲。成
熟有情聲。度三惡趣聲。修治圓滿六到彼岸聲。善巧
方便聲。趣人十地聲。遊戲神通聲。遊戲清淨無上大
乘聲。不退轉地聲。無生法忍聲。灌頂受位聲。趣人一

切諸佛大海聲。爾時一切諸來大眾咸見如是種種雲雨亦聞如是諸法音聲。隨意所樂各見其身種種香花寶飾衣服之所莊嚴。又各自見兩手掌中持如意珠。從是一一如意珠中兩種種寶復從一如意珠中放諸光明。因光明故一一有情皆見十方殞伽沙等諸佛世界。又因光明見諸佛土一一世尊無量眾會恭敬圍遶。復因光明見諸佛土一切有情若有病者。因此光明之所照觸。眾病除愈。諸應被殺及囚繫者。光明照故。皆得解脫。諸身語意麤重穢濁。因光皆得輕軟清淨。諸飢渴者亦皆飽滿。諸被種種刑罰。

逼切。光明照故。皆離憂苦。諸少衣服寶飾珍財。光明照故。隨念皆足。若諸有情樂欲殺生。乃至或有樂欲邪見。由此光明之所照觸。皆悉樂欲遠離殺生。乃至樂欲遠離邪見。若諸有情爲於種種求不得苦之所逼切。光明照故。隨願皆得。又因光明見諸佛土一切有情所受眾苦無不休息。皆悉歡娛受諸妙樂。又見如是諸佛土中。由此光明之所照觸。遠離一切昏雲塵霧。烈風暴雨。不善音聲。及諸臭穢苦辛惡味惡觸。恐怖。遠離一切邪業邪語邪意邪歸。不寒不熱。安靜坦然。地平如掌。諸妙樂具充滿其中。爾時眾會其身。

欻然地界增強堅重難舉。既覩斯瑞咸悉驚疑。何因何緣而現此相。於眾會中有天帝釋名無垢生。去薄伽梵不遠而坐。卽從座起頂禮世尊。合掌向佛以頌問曰。

具諦語諦見 諦善住牟尼 普爲眾弘宣

諦究竟堅法 令諸有情類 滅苦及苦因

何緣於此中 現諸雲雨等 令舉眾歡悅

咸生淨信心 皆發趣大乘 度疑生實見

天人大眾身 地界增堅重 不能自勝舉

此相有何緣 兩手皆珠現 雨眾寶放光

照十方除罪 息苦獲安樂 導師復何因

令舉眾皆見 種種香鬘等 各各自嚴身

天人普猶豫 不測何因緣 有誰將欲來

現此神通力 爲是佛菩薩 爲梵魔釋天

唯願大導師 速爲眾宣說

爾時世尊告無垢生天帝釋曰。汝等當知。有菩薩摩

訶薩。名曰地藏。已於無量無數大劫。五濁惡時。無佛

世界。成熟有情。今與八十百千那庾多頻跋羅菩薩

俱。爲欲來此禮敬親近供養我故。觀大集會生隨喜

故。并諸眷屬。作聲聞像。將來至此。以神通力。現是變

化。是地藏菩薩摩訶薩。有無量無數不可思議殊勝功德之所莊嚴。一切世間聲聞獨覺所不能測。此大菩薩。是諸微妙功德伏藏。是諸解脫珍寶出處。是諸菩薩明淨眼目。是趣涅槃商人導首。如如意珠。雨眾財寶。隨所希求。皆令滿足。譬諸商人所採寶渚。是能生長善根良田。是能盛貯解脫樂器。是出妙寶功德賢瓶。照行善者。猶如朗日照失道者。猶如明炬除煩惱熱。如月清涼。如無足者所得車乘。如遠涉者所備資糧。如迷方者所逢示導。如狂亂者所服妙藥。如疾病者所遇良醫。如羸老者所凭几杖。如疲倦者所止。

牀座。度四流者。爲作橋梁。趣彼岸者。爲作船筏。是三善根。殊勝果報。是三善本。所引等流。常行惠施。如輪恆轉。持戒堅固。如妙高山。精進難壞。如金剛寶。安忍不動。猶如大地。靜慮深密。猶如祕藏。等至嚴麗。如妙花鬘。智慧深廣。猶如大海。無所染著。譬太虛空。妙果近因。如眾花葉。伏諸外道。如師子王。降諸天魔。如大龍象。斬煩惱賊。猶如神劍。厭諸諠雜。如獨覺乘。洗煩惱垢。如清淨水。能除臭穢。如疾飄風。斷眾結縛。如利刀劍。護諸怖畏。如親如友。防諸怨敵。如塹如城。救諸危難。猶如父母。藏諸怯劣。猶若叢林。如夏遠行。所投

大樹。與熱渴者作清冷水。與飢乏者作諸甘果。爲露形者作諸衣服。爲熱乏者作大密雲。爲貧匱者作如意寶。爲恐懼者作所歸依。爲諸稼穡作甘澤雨。爲諸濁水作月愛珠。令諸有情善根不壞。現妙境界。令眾欣悅。勸發有情。增上慚愧。求福慧者。令具莊嚴。能除煩惱。如吐下藥。能攝亂心。如等持境。辯才無滯。如水激輪。攝事繫心。如觀妙色。安忍堅住。如妙高山。總持深廣。猶如大海。神足無礙。譬若虛空。滅除一切惑障。習氣。猶如烈日。銷釋輕冰。常遊靜慮。無色正道。一切智智。妙寶洲堵。能無功用。轉大法輪。善男子。是地藏